

摘藻堂四庫全書薈要

史部

欽定四庫全書叢要

史部

後漢書卷十四至  
六

詳校官內閣侍讀孫球



欽定四庫全書薈要卷三千八百四十九

史部

後漢書卷十四

梁

剡

令劉

昭補并注

禮儀志第四

禮儀上

合朔  
上陵

立春  
冠

五供  
夕牲

耕  
先蠶

高禩  
袞襖

養老

夫威儀所以與君臣序六親也若君亡君之威臣亡臣之儀上替下陵此謂大亂大亂作則羣生受其殃可不

慎哉故記施行威儀以為禮儀志

謝沈書曰太傅胡廣博綜舊儀立漢制度

蔡邕因以為志譙周後改定以為禮儀志

禮威儀每月朔旦太史上其月歷有司侍郎尚書見讀其令奉行其政朔前後各二日皆牽羊酒至社下以祭日日有變割羊以祠社用救日日變執事者冠長冠衣皂單衣絳領袖綠中衣絳袴練以行禮如故事

公羊傳曰日有

食之鼓用牲于社求乎陰之道也以朱絲縈社或曰脅之或曰為閭恐人犯之故縈之也何休曰脅之與責求同義社者土地之主也月者土地之精也上繫於天而犯日故鳴鼓而攻之脅其本也朱絲縈之助陽抑陰也

或曰為閻者社者土地之主尊也為日光盡天閻冥恐人犯歷之故崇之然此說非也先言鼓後言用牲者明先以尊者命責之後以臣子禮接之所以為順也白虎通曰日食必救之陰侵陽也鼓攻之以陽責陰也故春秋日食鼓用牲于社所以必用牲者土地別神也尊之不敢虛責也日食大水則鼓用牲大旱則雩祭求雨非虛言也助陽責下求陰之道也決疑要注曰凡救日食皆著赤幘以助陽也日將食天子素服避正殿內外嚴日有變伐鼓聞音侍臣著赤幘帶劍入侍三臺令史已下皆持劍立其戶前衛尉卿驅馳繞宮察巡守備周而復始日復常乃皆罷之

立春之日夜漏未盡五刻京師百官皆衣青衣郡國縣道官下至斗食令史皆服青幘立青幡施土牛耕人于

門外以示兆民至立夏唯武官不立春之日下寬大書  
曰制詔三公方春東作敬始慎微動作從之罪非殊死  
且勿案驗皆須麥秋退貪殘進柔良下當用者如故事  
月令曰命相布德和令蔡邕曰即此詔之謂也獻帝起  
居注曰建安二十二年二月壬申詔書絕立春寬緩詔  
書不復行

正月上丁祠南郊

白虎通曰春秋傳曰以正月上辛尚書曰丁巳用牲于郊牛二先甲三日

辛也後甲三日丁也禮畢次北郊明堂高廟世祖廟謂  
皆可接事昊天之日

之五供五供畢以次上陵西都舊有上陵東都之儀百

官四姓親家婦女公主諸王大夫

蔡邕獨斷曰凡與先后有瓜葛者

外

國朝者侍子郡國計吏會陵晝漏上水大鴻臚設九賓

隨立寢殿前

薛綜曰九賓謂王侯公卿二千石六百石下及郎吏匈奴侍子凡九等

鍾鳴

謁者治禮引客羣臣就位如儀乘輿自東廂下太常導

出西向拜止旋升阼階拜神坐退坐東廂西向侍中尚

書陞者皆神坐後公卿羣臣謁神坐太官上食太常樂

奏食舉文始五行之舞

前書志曰文始舞者本韶舞也高祖六年更名文始以示不相

襲也五行舞者本周舞也秦始皇二十六年更名五行之舞也

禮樂闋君臣受賜食畢

郡國上計吏以次前當神軒占其郡穀價民所疾苦欲

神知其動靜孝子事親盡禮敬愛之心也周徧如禮

謝承

書曰建寧五年正月車駕上原陵蔡邕為司徒掾從公  
行到陵見其儀愼然謂同坐者曰聞古不墓祭朝廷有  
上陵之禮始為可損今見威儀察其本意乃知孝明皇  
帝至孝惻隱不可易舊或曰本意云何昔京師在長安  
時其禮不可盡得聞也光武即世始葬于此明帝嗣位  
踰年羣臣朝正感先帝不復聞見此禮乃帥公卿百寮  
就園陵而創馬尚書陞西陞為神坐天子事亡如事存  
之意苟先帝有瓜葛之屬男女畢會王侯大夫郡國計  
吏各向神坐而言庶幾先帝神魂聞之今者日月久遠  
後生非時人但見其禮不知其哀以明帝聖孝之心親  
服三年久在園陵初興此儀仰察几筵下顧羣臣悲切  
之心必不可堪邕見太傅胡廣曰國家禮有煩而不可



省者不知先帝用心周密之至於此也廣曰然子宜載之以示學者邕退而記焉魚豢曰孝明以正月旦百官及四方來朝者上原陵朝禮是謂甚違古不墓祭之義臣昭以為邕之言然

### 最後親陵遣計

### 吏賜之帶佩八月飲耐上陵禮亦如之

丁字漢儀曰耐金律文帝所加

以正月旦作酒八月成名耐酒因合諸侯助祭貢金漢律金布令曰皇帝齋宿親帥羣臣承祠宗廟羣臣宜分奉請諸侯列侯各以民口數率千口奉金四兩奇不滿千口至五百口亦四兩皆會耐少府受又大鴻臚食邑九真交趾日南者用犀角長九寸以上若瑇瑁甲一鬱林用象牙長三尺以上若翡翠各二十準以當金漢舊儀曰皇帝惟八月耐車駕夕牲牛以絳衣之皇帝暮視牲以鑑燧取水於月以火燧取火於日為明水火左袒以水沃牛右肩手執鸞刀以切牛尾薦之而即更衣中侍上熱乃祀之

### 凡齋天地七日宗

廟山川五日小祠三日齋日內有汙染解齋副倅行禮  
先齋一日有汙穢災變齋祀如儀大喪唯天郊越紼而  
齋地以下皆百日後乃齋如故事

魏文帝詔曰漢氏不拜日於東郊而旦夕

常於殿下東面拜日煩褻似家人之事非事天交神之道也於是朝日東門之外將祭必先夕牲其儀如郊

正月甲子若丙子為吉日可加元服儀從冠禮乘輿初  
緇布進賢次爵弁次武弁次通天以據皆於高祖廟如

禮謁

冠禮曰成王冠周公使祝雍曰辭達而勿多也祝雍曰近於民遠於年遠於佞近於義普於財任賢

使能博物記曰孝昭帝冠辭曰陛下擣顯先帝之光耀以承皇天之嘉祿欽奉仲春之吉辰普尊大道之郊域

秉率百福之休靈始加昭明之元服推遠冲孺之幼志  
蘊積文武之就德肅勤高祖之清廟六合之內靡不蒙  
德永永與天無極獻帝傳曰興平元年正月甲子帝加  
元服司徒淳于嘉為賓加賜玄纁駟馬貴人公主卿司  
隸城門五校及侍中尚書給事黃  
門侍郎各一人為太子舍人也  
王公以下初加進賢

而已

獻帝起居注曰建安十八年正月壬子濟北王加  
冠戶外以見父母給事黃門侍郎劉瞻兼侍中假

貂蟬加濟  
北王給之

正月天郊夕牲

周禮展牲千寶曰若今夕牲又郊儀先  
郊日未晡五刻夕牲公卿京尹眾官悉

至壇東就位太祝吏牽牲入到榜廩犧令跪曰請省牲  
舉手曰膾太祝令統牲舉手曰充太史令牽牲就庖豆  
酌毛血其一奠天神生前其一  
奠太祖生前今之郊祀然也  
晝漏未盡十八刻初納

夜漏未盡八刻初納

干寶周官注曰納亨納牲將告殺謂向祭之辰也

進熟獻

太祝送旋皆就燎位宰祝舉火燔柴火然天子再拜興有司告事畢也明堂五郊宗廟太社稷六宗夕牲皆以晝漏十四刻初納夜漏未盡七刻初納進熟獻送神還

有司告事畢六宗燔燎火大然有司告事畢

正月始耕

月令曰天子親載耒耜措之參保介之御間帥三公九卿躬耕帝藉盧植注曰帝天也藉

耕也晝漏上水初納執事告祠先農已享

賀循藉田儀曰漢耕日以太牢

祭先農於田所春秋傳曰耕藉之禮唯齋三日左傳曰鄙人藉稻杜預注曰藉稻履行之薛綜注二京賦曰為

天神借民力於此田故名曰帝藉田在國之辰地千寶周禮注曰古之王者貴為天子富有四海而必私置藉田蓋其義有三焉一曰以奉宗廟親致其孝也二曰以訓于百姓在勤勤則不匱也三曰聞之子孫躬知稼穡之艱難

無違也 耕時有司請行事就耕位天子三公九卿諸侯

百官以次耕

鄭玄注周禮曰天子三推公五推卿諸侯九推庶人終於千畝庶人謂徒三百人也

月令章句曰卑者殊勞故三公五推禮自上以下降殺以兩勞事反之諸侯上當有孤卿七推大夫十二士終畝可知也盧植注禮記曰天子耕藉一發九推耒周禮二耜為耦一耜之伐廣尺深尺伐發也天子及三公生而論道參五職事故三公以五為數卿諸侯當究成天子之職事故以九為數伐皆三者禮以三為文

力

田種各耰訖有司告事畢

史記曰漢文帝詔云農天下之本其開藉田朕躬耕以給

宗廟柰盛應劭曰古者天子耕藉田千畝為天下先藉者帝王典籍之常也而應劭風俗通又曰古者使民如借故曰藉田鄭玄曰藉之言借也王一耕之使庶人耘芋終之盧植曰藉耕也春秋傳曰鄙人藉稻故知藉為耕也韋昭曰借民力以治之以奉宗廟且以勸率天下使務農也杜預注曰鄙人藉稻其君自出藉稻蓋履行之贊曰藉稻藉也本以躬親為義不得以假借為稱也漢舊儀曰春始東耕於藉田官祠先農先農即神農炎帝也祠以一太牢百官皆從大賜三輔二百里孝悌力田三老帛種百穀萬斛為立藉田倉置令丞穀皆以給祭天地宗廟羣神之祀以為棗盛皇帝躬秉耒耜而耕古為甸師官賀循曰所種之穀黍稷種稷早也種晚也干寶周禮注曰種晚秔稻之屬稷黍穀黍稷之屬

是月令曰郡國守相皆勸民

始耕如儀諸行出入皆鳴鐘皆作樂其有災眚有他故

若請雨止雨皆不鳴鐘不作樂

春秋釋病曰漢家郡守行大夫禮鼎俎籩豆工

歌縣何休曰漢家法陳師置守相故行其樂也

仲春之月立高禘祠于城南祀以特牲

月令玄鳥至之日以太牢祠詩

曰克禋克祀以弗無子毛萇傳曰弗去無子求有子古者必立郊禘焉玄鳥至之日以太牢祀于郊禘天子親往后妃帥九嬪御乃禮天子所御帶以弓韜授以弓矢于郊禘之前鄭玄注云弗之言祓也禋祀上帝于郊禘以祓無子之疾而得福也月令章句曰高尊也禘祀也吉事先見之象也蓋為入所以祈子孫之祀玄鳥感陽而至其來主為孚乳蕃滋故重其至日因以用事契母簡狄蓋以玄鳥至日有事高禘而生契焉故詩曰天命玄鳥降而生商韜弓衣也祀以高禘之命飲之以醴帶以弓衣尚使得男也離騷曰簡狄在臺譽何宜玄鳥致

胎女何嘉王逸曰言簡狄侍帝譽於臺上有飛燕墮其卵嘉而吞之因生契鄭玄注禮記曰後王以為謀官嘉祥而立其祠盧植注云玄鳥至時陰陽中萬物生故於是三牲請于高禘之神居明顯之處故謂之高因其求子故謂之禘以為古者有媒氏之官因以為神晉元康中高禘壇上石破詔問出何經典朝士莫知博士東皙答曰漢武帝晚得太子始為立高禘之祠高禘者人之先也故立石為主祀以太牢

明帝永平二年三月上始帥羣臣躬養三老五更于辟

雍

孝經援神契曰尊三老者父象也謁者奉几安車輦輪供綏執事五更寵以度接禮交容謙恭順貌宋均

曰三老老人知天地人事者奉几授三老也安車坐乘之車輦輪蒲裹輪供綏三老就車天子親執綏授之五更老人知五行更代之事者度法也度以寵異之也鄭玄注禮記曰皆年老更事致仕者也名三五者取象三



辰五星天所因以照明天下者玄又一注皆老人更知  
三德五事者也應劭漢官儀曰三老五更三代所尊也  
安車輓輪送迎至家天子獨拜于屏三者道成於天地  
人老者久也舊也五者訓於五品更者五世長子更更  
相代言其能以善道改更已也三老五更皆取有首妻  
男女完具臣昭按桓榮五更後除兄子二人補四百石  
則榮非長子矣蔡邕曰五更長老之稱也

### 行大射之禮

袁山松書曰天子皮弁素積親射大侯

## 郡縣道行鄉飲酒于學校皆祀聖師周公孔子牲以犬

鄭玄注儀禮曰狗取擇人孟冬亦如之石渠論曰鄉射  
合樂而大射不何也韋玄成曰鄉人本無樂故於歲時  
合樂以同其意諸侯故自有樂故不復合樂鄭玄注鄉  
飲酒禮曰今郡國十月行鄉飲酒禮黨正每歲邦索鬼  
神而祭祀則以禮屬民而飲酒于序以正齒位之禮凡  
鄉黨飲酒必於民聚之時欲其見化知尚賢尊長也玄

冠衣皮弁服與禮異服虔應劭曰漢家郡縣饗射  
祭祀皆假士禮而行之樂縣笙磬簫俎皆如士制於是

七郊禮樂三雍之義備矣養三老五更之儀先吉日司

徒上太傅若講師故三公人名用其德行年耆高者一

人為老次一人為更也

盧植禮記注曰選三公老者為三老卿大夫中之老者為五更

亦參五之也皆服都紵大袍單衣皁緣領袖中衣冠進賢扶

玉杖五更亦如之不杖皆齋于太學講堂

月令章句曰三老國老也

五更庶老也

其日乘輿先到辟雍禮殿御坐東廂遣使者安

車迎三老五更天子迎于門屏交禮道自阼階三老升

自賓階至階天子揖如禮三老升東面三公設几九卿

正履天子親袒割牲執醬而饋執爵而酌祝鯁在前祝

饋在後

禮記曰天子適饌省醴養老之珍具遂發詠馬退修之以孝養反升歌清廟孝養之詩也

五

更南面公進供禮亦如之

譙周五經然否曰漢初或云三老答天子拜遭王莽之亂

法度殘缺漢中興定禮儀羣臣欲令三老答拜城門校尉董鈞駁曰養三老所以教事父之道也若答拜是使天下答子拜也詔從鈞議譙周論之曰禮尸服上服猶以非親之故答子拜士見異國君亦答拜是皆不得視猶子也虞喜曰且據漢儀於門屏交禮交禮即答拜中興謬從鈞議後革之深得其意

明日皆詣

闕謝恩以見禮遇大尊顯故也

前書禮樂志曰顯宗因祀光武皇帝於明堂養

三老五更於辟雍威儀既盛矣德化未流洽者以其禮樂未具羣下無所誦說而庠序尚未設之故也孔子曰譬如為山未成一簣止吾止也

# 是月皇后帥公卿諸侯夫人蠶

丁孚漢儀曰皇后出乘鸞輅青羽蓋駕駟馬龍

旂九旒大將軍妻參乘太僕妻御前鸞旂車皮軒闌戟雒陽令奉引亦千乘萬騎車府令設鹵簿駕公卿五營校尉司隸校尉河南尹妻皆乘其官車帶夫本官綬從其官屬導從皇后置虎賁羽林騎戎頭黃門鼓吹五帝車女騎夾轂執法御史在前後亦有金鉞黃鉞五將導桑于蠶宮手三盆于繭館畢還宮月令曰禁婦人毋觀按谷永對稱四月壬子皇后蠶桑之日也則漢桑亦用四月

## 祠先蠶禮以少牢

漢舊儀曰春桑生而皇后視桑於苑中蠶室養蠶千薄以上祠以中牢羊豕今蠶神曰菀窳婦人寓氏公主凡二神羣臣

妾從桑還獻於繭觀皆賜從桑者樂皇后自行凡蠶絲  
絮織室以作祭服祭服者冕服也天地宗廟羣臣五時  
之服其皇帝得以作縷縫衣得以作中絮而已置蠶官  
令丞諸天下官皆詣蠶室亦婦人從事故舊有東西織  
室作法晉后祠先蠶先蠶壇高一丈方二  
丈為四出陸陸廣五尺在采桑壇之東南

是月上巳官民皆絮於東流水上曰洗濯袪除去宿垢

疾為大絮絮者言陽氣布暢萬物訖出始絮之矣

謂之  
禊也

風俗通曰周禮女巫掌歲時以袪除疾病禊者絮也春  
者蠶也蠶搖動也尚書以殷仲春厥民析言人解析也  
蔡邕曰論語暮春者春服既成冠者五六人童子六七  
人浴乎沂風乎舞雩詠而歸自上及下古有此禮今三  
月上巳袪禊於水濱蓋出於此杜篤袪禊賦曰巫咸之  
徒秉火祈福則巫祝也一說云後漢有郭虞者三月上

已產二女二日中並不育俗以為大忌至此月日諱止  
家皆於東流水上為祈禳自潔濯謂之禊祠引流行觴  
遂成曲水韓詩曰鄭國之俗三月上巳之溱洧兩水之  
上招魂續魄秉蘭草祓除不祥漢書八月祓灞水亦斯  
義也後之良史亦據為正臣昭曰郭虞之說良為虛誕  
假有庶民旬內天其二女何足驚彼風俗稱為世忌乎  
杜篤乃稱王侯公主暨于富商用事伊維帷幔玄黃本  
傳大將軍梁商亦歌泣於雒禊也自魏不復用三日水  
宴者  
馬

## 後漢書卷十四

欽定四庫全書齋要卷三千八百五十

史部

後漢書卷十五

梁

剡

令劉

昭補并注

禮儀志第五

禮儀中

立夏

請雨

拜皇太子

拜王公

桃印

黃郊

立秋

驅劉

案戶

祠星

立冬

冬至

臘

大儺

土牛

遣衛士

朝會

立夏之日夜漏未盡五刻京都百官皆衣赤至季夏衣

黃郊其禮祠特祭竈

自立春至立夏盡立秋郡國上雨澤若少府郡縣各掃

除社稷其旱也公卿官長以次行雩禮求雨

公羊傳曰大雩旱祭

也何休注曰君親之南郊以六事謝過自責曰政不善與民失職與宮室崇與婦謁盛與苞苴行與讒夫倡與使童男女各八人舞而呼雩故謂之雩春秋繁露曰大旱雩祭而請雨大水鳴鼓而攻社天地之所為陰陽之所起也或請焉或怒焉何如也曰大旱陽滅陰也陽滅陰者尊厭卑也固其義也雖大甚拜請之而已敢有加也大水者陰滅陽也陰滅陽者卑勝尊也以賤陵貴者逆節故鳴鼓而攻之朱絲而脅之為其不義此亦春秋之不畏強禦也變天地之位正陰陽之序貞行其道而不忘其難義之至也又仲舒奏江都王云求雨之方損陽益陰願大王無收廣陵女子為人祝者一月租賜諸巫者諸巫母大小皆相聚於郭門為小壇以脯酒祭女



獨擇寬大便處移市市使無內丈夫丈夫無得相從飲  
食令吏妻各往視其夫皆到即起雨注而已服虔注左  
傳曰大雩夏祭天名雩遠也遠為百穀求膏雨也龍見  
而雩龍角亢也謂四月昏龍星體見萬物始盛待雨而  
大故雩祭以求雨也一說大雩者祭於帝而祈雨也一  
說郊祀天祈農事雩祭山川而祈雨也漢舊儀求雨太  
常禱天地宗廟社稷山川以賽各如其常牢禮也四月  
立夏旱乃求雨禱雨而已後旱復重禱而已訖立秋雖  
旱不得禱

### 閉諸陽衣皂興土龍

山海經曰大荒東北隅  
有山名曰凶犁土丘應

龍處南極殺蚩尤與夸父不得復上故下數旱旱而為  
應龍之狀乃得大雨郭璞曰今之土龍本此氣應自然  
冥感非人所能為也董仲舒云春旱求雨令縣邑以水  
日令民禱社稷家人祠戶母伐名木毋斬山林暴巫聚  
蛇八日於邑東門之外為四通之壇方八尺植蒼繒八  
其神共工祭之以生魚八玄酒具清酒搏脯擇巫之潔

清辯口利辭者以為祝祝齋三日服蒼衣先再拜乃跪  
陳陳已復再拜乃起祝曰昊天生五穀以養人今五穀  
病旱恐不成敬進清酒搏脯再拜請雨雨幸大澍奉牲  
禱以甲乙日為大青龍一長八丈居中央為小龍七各  
長四丈於東方皆東鄉其間相去八尺小僮八人皆齋  
三日服青衣而舞之田嗇夫亦齋三日服青衣而立之  
諸里社通之於閭外之溝取五蝦蟆錯置社之中池方  
八尺深一尺置水蝦蟆具清酒搏脯祝齋三日服蒼  
衣拜跪陳祝如初取三歲雄雞與三歲玃猪皆燔之於  
四通神宇令民闔邑里南門置水其外開里北門具老  
玃猪一置之里北門之外市中亦置一玃猪聞彼鼓聲  
皆燒猪尾取死人骨埋之開山淵積薪而焚之決通道  
橋之壅塞不行者決瀆之幸而得雨報以豚一酒鹽黍  
財足以茅為席毋斷夏求雨令縣邑以水日家人祀竈  
毋舉土功更大浚井暴釜於壇杵臼于街七日為四通  
之壇於邑南門之外方七尺植赤繒七其神蚩尤祭之

以赤雄雞七玄酒具清酒博脯祝齋三日服赤衣拜跪  
陳祝如春以丙丁日為赤大龍一長七丈居中又為小  
龍六長三丈五尺於南方皆南鄉其間相去七尺壯者  
七人皆齋三日服赤衣而舞之司空嗇夫亦齋三日服  
赤衣而立之鑿社而通之間外之溝取五蠟蠶錯置社  
之中池方七尺深一尺酒脯祭齋衣亦拜跪陳祝如初  
取三歲雄雞豕猪燔之四通神宇開陰閉陽如春也季  
夏禱山陵以助之令縣邑一徙市於邑南門之外五日  
禁男子無得行入市家人祠中雷毋舉土功聚巫市旁  
為之結蓋為四通之壇於中央植黃繒五具神后稷祭  
之以毋飽五玄酒具清酒博脯令各為祝齋三日衣黃  
衣皆如春祠以戊巳日為大黃龍一長五丈居中央又  
為小龍四各長二丈五尺於中央皆南鄉其間相去五  
尺丈夫五人皆齋三日服黃衣而舞之老者亦齋三日  
衣黃衣而立之亦通社中於間外溝蠟蠶池方五尺深  
一尺他皆如前秋暴巫疋至九日毋舉火事煎金器家

人祠門為四通之壇於邑西門之外方九尺植白繒九  
其神大昊祭之桐木魚九玄酒具清酒搏脯衣白衣他  
如春以庚辛日為大白龍一長九丈居中央為小龍八  
各長四丈五尺於西方皆西鄉其間相去九尺鰥者九  
人皆齋三日服白衣而舞之司馬亦齋三日衣白衣而  
立之蝦蟇池方九尺深一尺他如前冬舞龍六日禱於  
名山以助之家人祠井毋壅水為四通之壇於邑北門  
之外方六尺植黑繒六其神玄冥祭之以黑狗子六玄  
酒具清酒搏脯祝齋三日衣玄衣祀禮如春以壬癸日  
為大黑龍一長六丈居中央又為小龍五各長三丈於  
北方皆北鄉其間相去六尺老者六人皆齋三日衣黑  
衣而舞之尉亦齋三日服黑衣而立之蝦蟇池皆如春  
四時皆庚子日令吏民夫婦皆偶處凡求雨大體丈夫  
欲藏而居女子欲和而樂應龍有翼法言曰象龍之致  
雨艱矣哉龍乎龍乎新論曰劉歆致雨具作土龍吹律  
及諸方術無不備設譚問求雨所以為土龍何也曰龍

見者輒有風雨興起以迎  
送之故緣其象類而為之  
立土人舞僮二佾七日一變

如故事

周禮曰望舞帥而舞早暎之事鄭玄曰望亦皂  
染羽為之也早暎注陽也用假色者欲其有時

而去  
反拘朱索社伐朱鼓

漢舊儀曰成帝二年六月始  
命諸官止雨朱繩反縈社擊

鼓攻之是後水旱常不和于寶曰朱絲縈社社太陰也  
朱火色也絲維屬天子伐鼓於社責羣陰也諸侯用幣  
於社請上公也伐鼓於朝退禱賽以少牢如禮

漢舊儀  
曰武帝

自攻也此聖人厭勝之法也  
元封日到七月畢賽之秋冬春不求雨古今注曰  
武帝元封六年五月旱女及巫丈夫不入市也

拜皇太子之儀百官會位定謁者引皇太子當御坐殿

下北面司空當太子西北東面立讀策書畢中常侍持

皇太子璽綬東向授太子太子再拜三稽首謁者贊皇太子臣某中謁者稱制曰可三公升階上殿賀壽萬歲因大赦天下供賜禮畢罷

拜諸侯王公之儀百官會位定謁者引光祿勳前

丁字漢儀

曰太常住蓋下東向讀文與此異也

謁者引當拜前當坐伏殿下光祿勳

前一拜舉手曰制詔其以某為某

丁字漢儀有夏勤策文曰維元初六年三

月甲子制詔以大鴻臚勳為司徒曰朕承天序惟稽古建爾于位為漢輔往率舊職敬敷五教五教在寬左右朕躬宣力四表保乂皇家於戲實惟秉國之讀策書畢均旁祇厥緒時亮天工可不慎與勤而戒之

謁者稱臣某再拜尚書郎以璽印綬付侍御史侍御史  
前東面立授璽印綬王公再拜頓首三下贊謁者曰某  
王臣某新封某公某初謝中謁者報謹謝贊者立曰謝  
皇帝為公興皆冠謝起就位供賜禮畢罷

臣昭曰漢立  
皇后國禮之

大而志無其儀良未可了案蔡質所記立宋皇后儀今  
取以備闕云尚書令臣囂僕射臣鼎尚書臣旭臣乘臣  
滂臣謨臣詣稽首言伏惟陛下履乾則坤動合陰陽羣  
臣大小咸以長秋宮未定遵舊依典章表仍聞歷時乃  
聽令月吉日以宋貴人為皇后應期正位羣生兆庶莫  
不式舞易稱受茲介祉詩云千祿百福子孫千億萬方  
幸甚今吉日以定臣請太傅太尉司徒司空太常條列  
禮儀正處上羣臣妾無得上壽如故事臣囂臣鼎臣旭

臣乘臣滂臣謨臣詣愚闇不達大義誠惶誠恐頓首死罪稽首再拜以聞制曰可維建寧四年七月乙未制詔皇后之尊與帝齊體供奉天地祇承宗廟母臨天下故有莘興殷姜任母周二代之隆蓋有內德長秋宮闕中宮曠位宋貴人秉淑媛之懿體山河之儀威容昭曜德冠後庭羣寮所咨僉曰宜哉卜之蓍龜卦得承乾有司奏議宜稱紱組以臨兆民今使太尉襲使持節奉璽綬宗正祖為副立貴人為皇后其往踐爾位敬宗禮典肅慎中饋無替朕命永終天祿皇后初卽位章德殿太尉使持節奉璽綬天子臨軒百官陪位皇后北面太尉住蓋下東向宗正大長秋西向宗正讀策文畢皇后拜稱臣妾畢住位太尉襲授璽綬中常侍長樂太僕高鄉侯覽長跪受璽綬奏於殿前女史授嬈好嬈好長跪授以授昭儀昭儀受長跪以帶皇后皇后伏起拜稱臣妾訖黃門鼓吹三通鳴鼓畢羣臣以次出后卽位大赦天下皇后秩比國王卽位威儀赤紱玉璽



仲夏之月萬物方盛日夏至陰氣萌作恐物不楨其禮

以朱索連葦菜彌牟朴蠱鍾以桃印長六寸方三寸五

色書文如法以施門戶代以所尚為飾夏后氏金行作

葦茭言氣交也

風俗通曰傳曰萑葦有叢呂氏春秋湯始得伊尹被之於廟薰以萑葦周禮卿

大夫之子名曰門子論語曰誰能出不由戶故用葦者欲人之子孫蕃殖不失其類有如萑葦茭者交易陰陽

代興者也殷人水德以螺首慎其閉塞使如螺也周人木德

以桃為更言氣相更也漢兼用之故以五月五日朱索

五色印為門戶飾以難止惡氣

桃印本漢制所以輔卯金魏除之也

日夏

至禁舉大火止炭鼓鑄消石冶皆絕止至立秋如故事  
是日浚井改水日冬至鑽燧改火云

先立秋十八日郊黃帝是日夜漏未盡五刻京都百官  
皆衣黃至立秋迎氣於黃郊樂奏黃鍾之宮歌帝臨冕  
而執干戚舞雲翹育命所以養時訓也

立秋之日夜漏未盡五刻京都百官皆衣白施皂領緣  
中衣迎氣於白郊禮畢皆衣絳至立冬

立秋之日自郊禮畢始揚威武斬牲於郊東門以薦陵

廟其儀乘輿御戎路白馬朱鬣躬執弩射牲牲以鹿麋

月令曰天子乃厲勅執弓挾矢以獵月令章句曰親執弓以射禽所以教兆民載戰事也四時閑習以教無辜以伐有罪所以強兵保民安不忘危也

太宰令謁者各一人載獲車馳馬

送陵廟還宮遣使者齋束帛以賜武官

漢官名秩曰賜太尉將軍各六

十匹執金吾諸校尉各三十匹武官倍於文官

武官肄兵習戰陣之儀斬牲之

禮名曰貍劉兵官皆肄孫吳兵法六十四陣名曰乘之

月令孟冬天子講武習射御角力盧植注曰角力如漢家乘之引闕蹋鞠之屬也今月令季秋天子乃教田獵以習五戎月令章句曰寄戎事之教於田獵武事不可空設必有以誠故寄教於田獵閑肄五兵天子諸侯無

事而不田為不敬田不以禮為暴天物周禮司馬以旗  
致民平列陣如戰之陣王執路鼓諸侯執賁鼓軍將執  
晉鼓師帥執提旅師執鞶卒長執鐃兩司馬執鐸公司  
馬執錫以教生作進退疾徐疏數之節士卒聽聲視旗  
隨而前却故曰師之耳目在吾旗鼓春教振旅以蒐田  
夏教芟舍以苗田秋教治兵以獮田冬教大閱以狩田  
春夏示行禮取禽供事而已秋者殺時田獵之正其禮  
盛獨斷曰巡狩校獵還公卿以下陳維陽都亭前街上  
乘輿到公卿下拜天子下車公卿親識顏色然後還宮  
古語曰在車為下唯此時施行魏書曰建安二十一年  
三月曹公親耕藉田有司奏四時講武於農隙漢承秦  
制三時不講唯十月車駕幸長安水南門會五營士為  
八陣進退名曰乘之今金革未偃士民素習可無四時  
講武但以立秋擇吉日大朝車騎號曰治兵上合禮名  
下承漢制也

立春遣使者齋束帛以賜文官

漢官名秩曰賜  
司徒司空帛四

十匹九卿十五匹古今注曰建武八年立春賜公十五匹卿十匹

軀劉之禮祠先虞執

事告先虞已烹鮮時有司乃逡巡射牲獲車畢有司告

事畢

古今注曰永平元年六月乙卯初令百官軀臘白幕皆霜風俗通稱韓子書山居谷汲者臘臘而寘

水楚俗常以十二月祭飲食也又曰當新始殺食曰軀臘

仲秋之月縣道皆案戶比民年始七十者授之以玉杖  
舖之糜粥八九十禮有加賜玉杖長尺端以鳩鳥為  
飾鳩者不噎之鳥也欲老人不噎是月也祀老人星于

國都南郊老人廟

季秋之月祠星于城南壇心星廟

立冬之日夜漏未盡五刻京都百官皆衣皂迎氣於黑郊禮畢皆衣絳至冬至絕事

冬至前後君子安身靜體百官絕事不聽政擇吉辰而後省事絕事之日夜漏未盡五刻京都百官皆衣絳至立春諸王時變服執事者先後其時皆一日日冬至夏至陰陽晷景長短之極微氣之所生也

白虎通曰至日所以休兵不興

事閑闕商旅不行何此日陰陽氣微王者承天理物故率天下靜不復行役以扶助微氣成萬物也夏至陰氣

始動冬至陽氣始萌易曰先王以至日閉闕商旅不行  
夏至陰始起反大熱何陰氣始起陽氣推而上故大熱  
也冬至陽始起陰氣  
推而上故大寒也 故使八能之士八人或吹黃鍾之

律間竽或撞黃鍾之鍾或度晷景權水輕重水一升冬  
重十三兩或擊黃鍾之磬或鼓黃鍾之瑟軫間九尺二  
十五弦宮處于中左右為商徵角羽或擊黃鍾之鼓先  
之三日太史謁之至日夏時四孟冬則四仲其氣至焉  
先氣至五刻太史令與八能之士即坐于端門左塾太  
子具樂器夏赤冬黑列前殿之前西上鍾為端守宮設

席于器南北面東上正德席鼓南西面令晷儀東北三刻中黃門持兵引太史令八能之士入自端門就位二刻侍中尚書御史謁者皆陞一刻乘輿親御臨軒安體靜居以聽之太史令前當軒溜北面跪舉手曰八能之士以備請行事制曰可太史令稽首曰諾起立少退顧令正德曰可行事正德曰諾皆旋復位正德立命八能士曰以次行事間音以竽八能曰諾五音各三十為闕正德曰合五音律先唱五音並作二十五闕皆音以竽



樂叶圖徵曰夫聖人之作樂不可以自娛也所以觀得失之效者也故聖人不取備於一人必從八能之士故撞鍾者當知鍾擊鼓者當知鼓吹管者當知管吹竽者當知竽擊磬者當知磬鼓琴者當知琴故八士曰或調陰陽或調律歷或調五音故撞鍾者以知法度鼓琴者以知四海擊磬者以知民事鍾音調則君道得君道得則黃鍾蕤賓之律應君道不得則鍾音不調鍾音不調則黃鍾蕤賓之律不應鼓音調則臣道得臣道得則太簇之律應管音調則律歷正律歷正則夷則之律應磬音調則民道得民道得則林鍾之律應竽音調則法度得法度得則無射之律應琴音調則四海合歲氣百川一合德鬼神之道行祭祀之道得如此則姑洗之律應五樂皆得則應鍾之律應天地以和氣至則和氣應和氣不至則天地和氣不應鍾音調下臣以法賀主鼓音調主以法賀臣磬音調主以德施於百姓琴音調主以德及四海八能之士常以日冬至成天文日夏至成地

理作陰樂以成天文  
作陽樂以成地理

訖正德曰八能士各言事八能士

各書板言事文曰臣某言今月若干日甲乙日冬至黃

鍾之音調君道得孝道褒商臣角民徵事羽物各一板

否則召太史令各板書封以皂囊送西陞跪授尚書施

當軒北面稽首拜上封事尚書授侍中常侍迎受報聞

以小黃門幡麾節度太史令前曰禮畢制曰可太史令

前稽首曰諾太史令八能士詣太官受賜陞者以次罷

日夏至禮亦如之

蔡邕獨斷曰冬至陽氣始動夏至陰氣始起麋鹿角解故寢兵鼓身欲寧

志欲靜故不聽事迎送五日臘者歲終大祭縱吏民宴  
飲非迎氣故但送不迎正月歲首亦如臘儀冬至陽氣  
起君道長故賀夏至陰氣起君道衰故不賀鼓以動  
衆鍾以止衆故夜漏盡鼓鳴則起晝漏盡鍾鳴則息

季冬之月星迴歲終陰陽以交勞農大享臘

高堂隆曰帝王各以

其行之盛而祖以其終而臘火生於寅盛於午終於戌  
故火家以午祖以戌臘秦靜曰古禮出行有祖祭歲終  
有蜡臘無正月必祖之祀漢氏以午祖以戌臘午南方  
故以祖冬者歲之終物畢成故以戌臘而小數之學者  
因為之說  
非典文也

先臘一日大儺

譙周論語注曰儺却之也謂之逐疫

漢舊儀曰顓頊氏有三子生而

亡去為疫鬼一居江水是為虎一居若水是為罔兩蜮  
鬼一居人宮室區隅漚庾善驚人小兒月令章句曰日

行北方之宿北方大陰恐為所抑故命有司大饗所以扶陽抑陰也盧植禮記注曰所以逐衰而迎新其

儀選中黃門子弟年十歲以上十二以下百二十人為

佞子皆赤幘皂製執大鼗

漢舊儀曰方相帥百隸及童女以桃弧棘矢土鼓鼓且射

之以赤丸五穀播灑之譙周論語注曰以葦矢射之薛綜曰佞之言善善童幼子也方相氏黃金

四目蒙熊皮玄衣朱裳執戈揚盾十二獸有衣毛角中

黃門行之冗從僕射將之以逐惡鬼于禁中夜漏上水

朝臣會侍中尚書御史謁者虎賁羽林郎將執事皆赤

幘陸衛乘輿御前殿黃門令奏曰佞子備請逐疫於是

中黃門倡侂子和曰甲作食舛腴胃食虎雄伯食魃騰  
簡食不祥攬諸食咎伯奇食夢強梁祖明共食磔死寄  
生委隨食觀錯斷食巨窮奇騰根共食蠱凡使十二神  
追惡凶赫女軀拉女幹節解女肉抽女肺腸女不急去

後者為糧

東京賦曰捐魃魃斷獠狂斬委蛇腦方良因耕父於清冷溺女魃於神潢殘夔魃與罔象

殪壑仲而殲游光注曰魃魃山澤之神獠狂惡鬼委蛇大如車轂方良草澤神耕父女魃皆旱鬼惡水故囚溺於水中使不能為害夔魃罔象木石之怪壑仲游光兄弟八人恒在人間作怪害也孔子曰木石之怪夔罔兩水之怪龍罔象臣昭曰木石山怪也夔一足越人謂之山獠罔兩山精好學人聲而迷惑人龍神物也非所常

見故曰怪罔象食人一名  
沐癭埤蒼曰獠狂無頭鬼

因作方相與十二獸儻呼

周徧前後省三過持炬火送疫出端門

東京賦曰煌火馳而星流逐赤

疫於四裔注曰煌火光逐驚走煌然火光如星馳赤疫疫鬼惡者也依子合三行從東序上西序下

門外

騶騎傳炬出宮司馬闕門門外五營騎士傳火棄雒水

中東京賦注曰衛士千人在端門外五營千騎在衛士外為三部更送至雒水凡三輩逐鬼投雒水中仍上

天池絕其橋梁使不得度還

百官官府各以木面獸能為儺人師訖

設桃梗鬱儡葦畢執事陸者罷

山海經曰東海中有度朔山上有大桃樹

蟠屈三千里其卑枝門曰東北鬼門萬鬼出入也上有二神人一日神荼一日鬱儡主閱領衆鬼之惡害人者

執以葦索而用食虎於是黃帝法而象之毆除畢因立  
桃梗於門戶上畫鬱儻持葦索以御凶鬼畫虎於門當  
食鬼也史記曰東至於蟠木風俗通曰黃帝上古之時  
有神荼與鬱儻兄弟二人性能執鬼桃梗梗者更也歲  
終更始受介社也蘇代說孟嘗君曰土偶人語桃梗今  
子東國之桃木削子為人虎者陽物百獸之長能擊鷲  
性食鬼魁者也葦戟桃杖以賜公卿將軍特侯諸侯云漢官名秩曰大  
將軍三公臘賜錢各三十萬牛肉二百斤粳米二百斛  
特侯十五萬卿十萬校尉五萬尚書丞郎各萬五千石  
六百石各七千侍御史謁者議郎尚書令各五千郎官  
蘭臺令史三千中黃門羽林虎賁士二人共三千以為  
當祠門戶直各  
隨多少受也

是月也立土牛六頭於國都郡縣城外丑地以送大寒

月令章句曰是月之會建丑丑為牛寒將極是故出其物類形象以示送達之且以升陽也

饗遣故衛士儀百官會位定謁者持節引故衛士入白  
端門衛司馬執幡鉦護行行定侍御史持節慰勞以詔  
恩問所疾苦受其章奏所欲言畢饗賜作樂觀以角抵  
樂闋罷遣勸以農桑

周禮曰府史以下則有胥有徒鄭  
玄注曰此謂民給徭役若今衛士

矣蔡邕曰見客平樂  
饗衛士瑰偉壯觀也

每月朔歲首為大朝受賀其儀夜漏未盡七刻鐘鳴受  
賀及贄公侯璧中二千石二千石羔千石六百石鴈四



百石以下雉

獻帝起居注曰舊典市長執鴈建安八年始令執雉

百官賀正月

決疑

要注曰古者朝會皆執贄侯伯執圭子男執璧孤執皮帛卿執羔大夫執鴈士執雉漢魏粗依其制正旦大會諸侯執玉璧薦以鹿皮公卿以下所執如古禮古者衣皮故用皮帛為幣玉以象德璧以稱事不以貨沒禮度羞不踰牲宴衣不踰祭服輕重之宜也

二千石以上殿稱萬歲

蔡邕獨斷曰三

公奉壁上殿向御座北面太常贊曰皇帝為君興三公伏皇帝生乃進璧古語曰御坐則起此之謂也

舉

觴御坐前司空奉羹大司農奉飯奏食舉之樂百官受

賜宴饗大作樂

蔡質漢儀曰正月旦天子幸德陽殿臨軒公卿將大夫百官各陪朝賀蠻貊胡

羌朝貢畢見屬郡計吏皆陞覲庭燎宗室諸劉雜會萬人以上立西面位定公納薦太官賜食酒西入東出既

定上壽計吏中庭北面立太官上食賜羣臣酒食貢事  
御史四人執法殿下虎賁羽林弧弓撮矢陛戟左右戎  
頭偏脛陪前向後左右中郎將住東西羽林虎賁將住  
東北五官將住中央悉生就賜作九賓徹樂舍利從西  
方來戲於庭極乃畢入殿前激水化為比目魚跳躍嗽  
水作霧輶日畢化成黃龍長八丈出水遊戲於庭炫耀  
日光以兩大絲繩繫兩柱中頭間相去數丈兩倡女對  
舞行於繩上對面道逢切肩不傾又蹋局出身藏形於  
斗中鍾磬並作樂畢作魚龍曼延小黃門吹三通謁者  
引公卿羣臣以次拜微行出罷卑官在前尊官在後德  
陽殿周旋容萬人陞高二丈皆文石作壇激沼水於殿  
下畫屋朱梁玉階金柱刻鏤作宮掖之好廁以青翡翠  
一柱三帶韜以赤緹天子正旦節會朝百官於此自到  
偃師去宮四十三里望朱雀五闕德陽其上鬱律與天  
連雒陽宮閣傳云德陽宮殿南北  
行七丈東西行三十七丈四尺

其每朔唯十月旦從

故事者高祖定秦之月元年歲首也

蔡邕曰羣臣朝見之儀視不晚朝十

月朔之故以問胡廣廣曰舊儀公卿以下每月常朝先帝以其頻故省唯六月十月朔朝後復以六月朔盛暑省之蔡邕禮樂志曰漢樂四品一曰大予樂典郊廟上陵殿諸食舉之樂郊樂易所謂先王以作樂崇德殷薦上帝周官若樂六變則天神皆降可得而禮也宗廟樂虞書所謂琴瑟以詠祖考來假詩云肅雍和鳴先祖是聽食舉樂王制謂天子食舉以樂周官王大食則命奏鍾鼓二曰周頌雅樂典辟雍饗射六宗社稷之樂辟雍饗射孝經所謂移風易俗莫善於樂禮記曰揖讓而治天下者禮樂之謂也社稷詩所謂琴瑟擊鼓以御田祖者也禮記曰夫樂施於金石越於聲音用乎宗廟社稷事乎山川鬼神此之謂也三曰黃門鼓吹天子所以宴樂羣臣詩所謂坎坎鼓我蹲蹲舞我者也其短簫篪歌軍樂也其傳曰黃帝岐伯所作以建威揚德風勸士也

蓋周官所謂王大捷則令凱樂軍大獻則令凱歌也孝  
章皇帝親著歌詩四章列在食舉又制雲臺十二門詩  
各以其月祀而奏之嘉平四年正月中出雲臺十二門  
新詩下大予樂官習誦被聲與舊詩並行者皆當撰錄  
以成樂志

後漢書卷十五

欽定四庫全書薈要卷三千八百五十一

史部

後漢書卷十六

梁

剡

令劉

昭補并注

禮儀志第六

禮儀下

大喪

諸侯王列侯始封貴人公主薨

不豫太醫令丞將醫入就進所宜藥嘗藥監近臣中常侍小黃門皆先嘗藥過量十二公卿朝臣問起居無間太尉告請南郊司徒司空告請宗廟告五嶽四瀆羣祀

並禱求福疾病公卿復如禮登遐皇后詔三公典喪事  
百官皆衣白單衣白幘不冠閉城門宮門近臣中黃門  
持兵虎賁羽林郎中署皆嚴宿衛宮府各警北軍五校  
繞宮屯兵黃門令尚書御史謁者晝夜行陳三公啟手  
足色膚如禮皇后皇太子皇子哭踊如禮沐浴如禮守  
宮令兼東園匠將女執事黃縣緹繒金縷玉柙如故事

漢舊儀曰帝崩哈以珠纏以緹繒十二重以玉為襦如  
鎧狀連縫之以黃金為縷腰以下以玉為札長一尺二  
寸半為柙下至足亦縫以黃金縷請諸衣衾  
斂之凡乘輿衣服已御輒藏之崩皆以斂

飯哈珠玉

如禮

禮稽命徵曰天子飯以珠啗以玉諸侯飯以珠啗以珠卿大夫士飯以珠啗以貝

繫冰如

禮

周禮凌人天子喪供夷繫冰鄭玄曰夷之言尸也實冰于繫中置之尸牀之下所以寒尸也漢禮器制度

大繫廣八尺長一丈二尺深三尺漆赤中

百官哭臨殿下是日夜下竹使符

告郡國二千石諸侯王

應劭曰凡與郡國守相竹使符皆以竹箭五枚長五寸鐫刻篆

書第一至第五張晏曰符以代古之珪璋從簡易也此下大喪符亦猶斯比

竹使符到皆伏

哭盡哀

漢舊制發兵皆以銅虎符其餘徵調竹使而已符第合會為大信見杜詩傳

小斂如

禮東園匠考工令奏東園祕器表裏洞赤虞文畫日月

鳥龜龍虎連璧偃月牙檜梓宮如故事大斂于兩楹之

間五官左右虎賁羽林五將各將所部執虎賁戟屯殿  
端門陞左右廂中黃門持兵陞殿上夜漏羣臣入晝漏  
上水大鴻臚設九賓隨立殿下謁者引諸侯王立殿下  
西面北上宗室諸侯四姓小侯在後西面北上治禮引  
三公就位殿下北面特進次中二千石列侯次二千石  
六百石博士在後羣臣陪位者皆重行西上位定大鴻  
臚言具謁者以聞皇后東向貴人公主宗室婦女以次  
立後皇太子皇子在東西向皇子少退在南北面皆伏



哭大鴻臚傳哭羣臣皆哭三公升自阼階安梓宮內珪

璋諸物近臣佐如故事嗣子哭踊如禮

周禮駟珪璋璧琮琥璜之渠眉

疏璧琮以斂尸鄭司農曰駟外有提盧也謂珪璋璧琮琥璜皆為開渠為眉璜沙涂以斂尸令汁得流去也鄭玄曰以斂尸者於大斂焉加之也渠眉玉飾之溝璜也以組穿聯六玉溝璜之中以斂尸珪在左璋在首琥在右璜在足璧在背琮在腹蓋取象方明神之也疏璧琮者通於天地

東園匠武士下釘衽

截去牙

喪大記曰君蓋用漆三衽三束鄭玄注曰衽小腰

太常上太牢奠太官

食監中黃門尚食次奠執事者如禮太常大鴻臚傳哭

如儀三公奏尚書顧命太子即日即天子位于柩前請

太子即皇帝位皇后為皇太后奏可羣臣皆出吉服入

會如儀太尉升自阼階當樞御座北面稽首讀策畢以

傳國玉璽綬東面跪授皇太子即皇帝位中黃門掌兵

以玉具隨侯珠斬蛇寶劔授太尉告令羣臣羣臣皆伏

稱萬歲或大赦天下遣使者詔開城門宮門罷屯衛兵

羣臣百官罷入成喪服如禮兵官戎

文帝遺詔無布車及兵器應劭曰不

施輕車

三公太常如禮故事百官五日一會臨故吏二

千石刺史在京都郡國上計掾史皆五日一會天下吏

民發喪臨三日

文帝遺詔其令天下吏民令到出臨三日釋服

先葬二日皆旦

晡臨既葬釋服無禁嫁娶祠祀

文帝遺詔文有飲酒食肉自當給喪事服臨者

皆無踐踐徒跣也

佐吏以下布衣冠幘經帶無過三寸臨庭中

文帝遺詔殿中當臨者以旦夕各十五舉音禮畢罷非旦夕臨時禁無得擅哭臨

武吏布幘大

冠大司農出見錢穀給六丈布直以葬大紅十五日小

紅十四日織七日釋服

應劭曰紅者中祥大祥以紅為領緣織禫也凡三十六日而釋

部刺史二千石列侯在國者及關內侯宗室長吏及因郵奉奏諸侯王遣大夫一人奉奏弔臣請驛馬露布奏

可以木為重高九尺廣容八歷裹以葦席巾門喪帳皆以簾車皆去輔輻疏布惡輪走卒皆布構幘太僕四輪輶為賓車大練為屋幙中黃門虎賁各二十人執紼司空擇土造穿太史卜日謁者二人中謁者僕射中謁者

副將作油緹帳以覆坑方石治黃腸題湊便房如禮漢舊

儀畧載前漢諸帝壽陵曰天子即位明年將作大匠營陵地用地七頃方中用地一頃深十三丈堂壇高三丈墳高十二丈武帝墳高二十丈明中高一丈七尺四周二丈內梓棺柏黃腸題湊以次百官藏畢其設四通羨門容大車六馬皆藏之內方外陟車石外方立先閉劔戶戶設夜龍莫邪劔伏弩設伏火已營陵餘地為西園

后陵餘地為婕妤以下次賜親屬功臣漢書音義曰題頭也湊以頭向內所以為固也便房藏中便坐也皇覽曰漢家之墓方中百步已穿築為方城其中開四門四通足放六馬然後錯渾雜物杆漆繪綺金寶米穀及埋車馬虎豹禽獸發近郡卒徒置將軍尉侯以後宮貴幸者皆守園陵元帝葬乃不用車馬禽獸等物

大駕

太僕御方相氏黃金四目蒙熊皮玄衣朱裳執戈揚楯

立乘四馬先驅

周禮曰方相氏大喪先柩及墓入壙以戈擊四隅啟方良鄭玄曰方相放想也

可畏怖之貌壙穿地中也方良罔兩也天子之椁柏黃腸為裏表以石馬國語曰木石之怪夔罔兩

旂之

制長三仞十有二旂曳地畫日月升龍書旒曰天子之  
柩謁者二人立乘六馬為次大駕甘泉鹵簿金根容車

蘭臺法駕喪服大行載飾如金根車皇帝從送如禮太  
常上啟奠夜漏二十刻太尉冠長冠衣齋衣乘高車詣  
殿止車門外使者到南向立太尉進伏拜受詔太尉詣  
南郊未盡九刻大鴻臚設九賓隨立羣臣入位太尉行  
禮執事皆冠長冠衣齋衣太祝令跪讀諡策太尉再拜  
稽首治禮告事畢太尉奉諡策還詣殿端門太常上祖  
奠中黃門尚衣奉衣登容根車東園武士載大行司徒  
却行道立車前治禮引太尉入就位大行車西少南東

面奉策太史令奉哀策立後太常跪曰進皇帝進太尉  
讀謚策藏金匱皇帝次科藏於廟太史奉哀策葦篋詣  
陵太尉旋復公位再拜立哭太常跪曰哭大鴻臚傳哭  
十五舉音止哭太常行遣奠皆如禮請哭止哭如儀晝  
漏上水請發司徒河南尹先引車轉太常跪曰請拜送  
載車著白系參繆紉長三十丈大七寸為輓六行行五  
十人公卿以下子弟凡三百人皆素幘委貌冠衣素裳  
校尉三人皆赤幘不冠絳科單衣持幢幡候司馬丞為

行首皆銜枚羽林孤兒巴俞擢歌者六十人為六列鐸  
司馬八人執鐸先大鴻臚設九賓隨立陵南羨門道東  
北面諸侯王公特進道西北面東上中二千石二千石  
列侯宜九賓東北面西上皇帝白布幕素裏夾羨道東  
西向如禮容車幄坐羨道西南向車當坐南向中黃門  
尚衣奉衣就幄坐車少前太祝進醴獻如禮司徒跪曰  
大駕請舍太史令自車南北面讀哀策掌故在後已哀  
哭太常跪曰哭大鴻臚傳哭如儀司徒跪曰請就下位



東園武士奉下車司徒跪曰請就下房都導東園武士

奉車入房司徒太史令奉諡哀策

晉時有人嵩高山下得竹簡一枚上有兩

行科斗書之臺中外傳以相示莫有知者司空張華以

問博士束皙皙曰此明帝顯節陵中策也檢校果然是

知策用

此書也

東園武士執事下明器

禮記曰明器神明之也孔子謂為明器知喪道

矣備物而不可用也鄭玄注既

夕曰陳明器以西行南端為上

筥八盛容三升

鄭玄注既夕曰

筥盎種類也其

黍一稷一麥一粱一稻一麻一菽一小

容蓋與簋同

豆一甕三容三升醯一醢一屑一

鄭玄注既夕曰屑薑桂之屑

黍飴

載以木桁覆以疏布甒二容三升醴一酒一載以木桁

覆以功布瓦鍙一彤矢四軒輜中亦短衛彤矢四骨短

衛

既夕曰雖矢一乘骨鏃短衛鄭玄曰雖猶侯也侯物而射之矢也四矢曰乘骨鏃短衛亦示不用也生時

雖矢金鏃凡為矢五分筈長而羽其一通俗文曰細毛鏃也

彤弓一卮八牟八

鄭玄注既

夕曰牟盛湯漿

豆八籩八形方酒壺八槃匱一具

鄭玄注既夕曰槃匱盥器

也杖几各一蓋一鍾十六無虞罍四無虞

爾雅曰大鍾謂之罍郭璞

注曰書曰笙鏞以間亦名罍

磬十六無虞

禮記曰有鍾磬而無篳

堦

一簫四笙一箎一祝一敔一瑟六琴一竽一筑一坎侯

禮記曰琴瑟張而不平竽笙備而不和

干戈各一箠一甲一冑一

既夕謂之

後器鄭玄輓車九乘芻靈三十六匹

鄭玄注禮記曰芻靈束茅為人馬謂

之靈者神之類

瓦竈二瓦釜二瓦甑一瓦鼎十二容五升匏勺

一容一升瓦案九瓦大杯十六容三升瓦小杯二十容  
二升瓦飯槃十瓦酒樽二容五斗匏勺二容一升祭服  
衣送皆畢東園匠曰可哭在房中者皆哭太常大鴻臚  
請哭止如儀司徒曰百官事畢臣請罷從入房者皆再  
拜出就位太常導皇帝就贈位司徒跪曰請進贈侍中  
奉持鴻洞贈玉珪長尺四寸薦以紫巾廣袤各三寸緹

裏赤纁周緣贈幣玄三纁二各長尺二寸廣充幅皇帝  
進跪臨羨道房戶西向手下贈投鴻洞中三東園匠奉  
封入藏房中太常跪曰皇帝敬再拜請哭大鴻臚傳哭  
如儀太常跪曰贈事畢皇帝促就位

續漢書曰明帝崩司徒鮑昱典喪事

葬日三公入安梓宮還至羨道半逢上欲下昱前叩頭  
言禮天子鴻洞以贈所以重郊廟也陛下奈何冒危險  
不以義割  
哀上即還容根車游載容衣司徒至便殿並聲騎皆從

容車玉帳下司徒跪曰請就幄導登尚衣奉衣以次奉  
器衣物藏於便殿太祝進醴獻几下用漏十刻禮畢司

空將校復土皇帝皇后以下皆去麤服服大紅還宮反

廬立主如禮桑木主尺二寸不書諡虞禮畢祔於廟如

禮漢舊儀曰高帝崩三日小斂室中牖下作栗木主長八寸前方後圓圍一尺置牖中望外內張繇絮以郭

外以皓木大如指長三尺四枚纏以皓皮四方置牖中主居其中中央七日大斂棺以黍飯羊舌祭之牖中已葬

收主為木函藏廟太室中西牆壁垆中望內外不出室堂之上坐為五時衣冠履几杖竹籠為備人無頭坐起

如生時皇后主長七寸圍九寸在皇帝主右旁高皇帝主長九寸上林給栗木長安祠廟作神主東園祕器作

梓棺素木長丈三尺崇廣四尺先大駕日游冠衣于諸宮諸殿羣臣皆

吉服從會如儀皇帝近臣喪服如禮醪大紅服小紅十

一升都布練冠醪小紅服纖醪纖服留黃冠常冠近臣  
及二千石以下皆服留黃冠百官衣阜每變服從哭詣  
陵會如儀祭以特牲不進毛血首司徒光祿勳備三爵

如禮

古今注具載帝陵丈尺頃畝今附之後焉 光武  
原陵山方三百二十三步高六丈六尺垣四出司

馬門寢殿鍾虞皆在周垣內隄封田十二頃五十七畝  
八十五步帝王世紀曰在臨平亭之南西望平陰東南  
去雒陽十五里 明帝顯節陵山方三百步高八丈無  
周垣為行馬四出司馬門石殿鍾虞在行馬內寢殿園  
省在東園寺吏舍在殿北隄封田七十四頃五畝帝王  
世紀曰故富壽亭也西北去雒陽三十七里 章帝敬  
陵山方三百步高六丈二尺無周垣為行馬四出司馬  
門石殿鍾虞在行馬內寢殿園省在東園寺吏舍在殿

北隄封田二十五頃五十五畝帝王世紀曰在雒陽東南去雒陽三十九里和帝慎陵山方三百八十步高十丈無周垣為行馬四出司馬門石殿鍾虞在行馬內寢殿園省在東園寺吏舍在殿北隄封田三十一頃二十畝二百步帝王世紀曰在雒陽東南去雒陽四十一里 殤帝康陵山周二百八步高五丈五尺行馬四出司馬門寢殿鍾虞在行馬中因寢殿為廟園吏寺舍在殿北隄封田十三頃十九畝二百五十步帝王世紀曰高五丈四尺去雒陽四十八里 安帝恭陵山周二百六十步高十五丈無周垣為行馬四出司馬門石殿鍾虞在行馬內寢殿園吏舍在殿北隄封田一十四頃五十六畝帝王世紀曰高十一丈在雒陽西北去雒陽十五里 順帝憲陵山方三百步高八丈四尺無周垣為行馬四出司馬門石殿鍾虞在行馬內寢殿園省寺吏舍在殿東隄封田十八頃十九畝三十步帝王世紀曰在雒陽西北去雒陽十五里 冲帝懷陵山方百八十

三步高四丈六尺為寢殿行馬四出門園寺吏舍在殿東隄封田五頃八十畝帝王世紀曰西北去雒陽十五里 質帝靜陵山方百三十六步高五丈五尺為行馬四出門寢殿鍾虞在行馬中園寺吏舍在殿北隄封田十二頃五十四畝因寢為廟帝王世紀曰在雒陽東去雒陽三十二里 桓帝宣陵帝王世紀曰山方三百步高十二丈在雒陽東南去雒陽三十里 靈帝文陵帝王世紀曰山方三百步高十二丈在雒陽西北去雒陽二十里 獻帝禪陵帝王世紀曰不起墳深五丈前堂方一丈八尺後堂方一丈五尺角廣六尺在河內山陽之濁城西北去濁城直行十一里斜行七里去懷陵百一十里去山陽五十里南去雒陽三百一十里蔡質漢儀曰十二陵今見在河南尹無敬也 魏文帝終制畧曰漢文帝之不發霸陵無求也光武之掘原陵封樹也 霸陵之完功在釋之原陵之掘罪在明帝是釋之忠以利君明帝愛以害親也忠臣孝子宜思釋之之言察明



帝之戒存於所以安君定親使魂靈萬載無危斯則聖賢之忠孝矣自古及今未有不亡之國亦無不掘之墓也喪亂以來漢氏諸陵無不發掘至乃燒取玉柙金鏤骸骨并盡是焚如之刑也豈不重痛哉禍由乎厚葬封樹桑藿為我戒不亦明乎臣昭按董卓傳卓使呂布發諸帝陵及公卿以下冢墓收其珍寶卓別傳曰發成帝陵解金縷探合璣馬呂氏春秋略曰審知生聖人之要也審知死聖人之極也知生者不以物害生知死者不以物害死凡生於天地之間其必有死孝子之重其親者若親之愛其子不棄於溝壑故有葬送之義葬者藏也以生人心為之慮則莫如無動無動莫如無利藏淺則狐狸掘之深則及水泉故必高陵之上以避二害然而忘姦寇之變豈不惑哉民之于利也犯白刃涉危難以求之忍親戚欺知交以求之今無此危無此醜而為利甚厚固難禁也國彌大家彌富其葬彌厚珠玉金銅不可勝計姦人聞之轉以相告雖有嚴刑重罪不能止

也且死者彌久生者彌疏彌疏則守之彌怠藏器如故而守之有怠其勢固必掘矣世至為丘隴其高若山陵樹之若林藪或設闕庭都邑以此示富則可矣以此為死者則惑矣大凡死者其視萬世猶一瞑也人之壽久者不過百中者六十以百與六十為無窮者慮其情固不相當矣必以無窮為慮然後為可今有銘其墓曰此中有金寶甚厚不可掘也必為世笑矣而為之闕庭以自表此何異彼哉自古及今未有不亡之國也無不亡之國是無不掘之墓以耳目之所聞見則齊荆燕嘗亡矣宋中山已亡矣趙韓魏皆失其故國矣自此以上亡國不可勝數故其大墓無不掘也而猶皆爭為之豈不悲哉今夫君之不令民父之不教子兄之不悌弟皆鄉邑之所遺而憚耕耒之勞者也仍不事耕農而好鮮衣侈食智巧窮匱則合黨連眾而謀名丘大墓上曾不能禁也此有墓自表之禍也昔堯葬穀林通樹之舜葬紀市不變肆禹葬會稽不變人徒非愛其費以為死者也

先王之所惡惡死者之辱以為儉則不發不發則不辱故必以儉而合乎山原也宋未亡而東冢掘齊未亡而莊公掘國存而乃若此又况滅名之後乎此愛而厚葬之故也欲愛而反害之欲安而反危之忠臣孝子亦不可以厚葬矣昔季孫以璆璠斂孔子歷級而止之為無窮慮也

太皇太后皇太后崩司空以特牲告諡于祖廟如儀長樂太僕少府大長秋典喪事三公奉制度他皆如禮儀

丁字漢儀曰永平七年陰太后崩晏駕詔曰樞將發於殿羣臣百官陪位黃門鼓吹三通鳴鐘鼓天子舉哀女侍史官三百人皆著素參以白素引棺挽歌下殿就車黃門宦者引以出宮省太后魂車鸞路青羽蓋駟馬龍旂九旒前有方相鳳皇車大將軍妻參乘太僕妻御悉道公卿百官如天子郊園簿儀後和熹鄧后葬案以為

儀自此皆降  
損於前事也

合葬羨道開通皇帝謁便房太常導至羨  
道去杖中常侍受至柩前謁伏哭止如儀辭太常導出  
中常侍授杖升車歸宮已下反虞立主如禮諸郊廟祭  
服皆下便房五時朝服各一襲在陵寢其餘及宴服皆  
封以篋笥藏宮殿後閣室

諸侯王列侯始封貴人公主薨皆令贈印璽玉柙銀縷  
大貴人長公主銅縷諸侯王貴人公主公將軍持進皆  
賜器宮中二十四物使者治喪穿作柩椁百官會送如

故事諸侯王公主貴人皆樟棺洞朱雲氣畫公特進樟

棺黑漆中二千石以下坎侯漆

丁孚漢儀曰孝靈帝葬馬貴人贈步搖赤紱葬

青羽蓋駟馬柩下殿女侍史一百人着素衣挽歌引木下就車黃門宦者引出宮門

朝臣中二千

石將軍使者弔祭郡國二千石六百石以至黃綬皆賜

常車驛牛贈祭宜自佐史以上達大斂皆以朝服君臨

弔若遣使者主人免經去杖望馬首如禮免經去杖不

敢以戚凶服當尊者

前書賈山上書曰古之賢君子臣也尊其爵祿而親之疾則臨視之

無數死則往弔哭之臨其小斂大斂已棺塗而後為之服錫衰經而三臨其喪未斂而不飲酒食肉未葬不舉

樂可謂盡禮矣服法服端容貌正顏色然後見之故臣下莫敢不竭力盡死以報其上功德立於世而令問不忘也晉起居注曰太尉賈充薨皇太子妃之父又太保也有司奏依漢元明二帝親臨師保故事皇太子素服為發哀又臨其喪

自王主貴人以下至佐史送車騎導從吏卒

各如其官府載飾以蓋龍首魚尾華布牆纁上周交絡前後雲氣畫帷裳中二千石以上有輜左龍右虎朱鳥玄武公侯以上加倚鹿伏熊千石以下緇布蓋牆魚龍首尾而已二百石黃綬以下至于處士皆以簞席為牆蓋其正妃夫人妻皆如之諸侯王傅相中尉內史典喪

事大鴻臚奏諡天子使者贈壁帛載日命諡如禮下陵  
羣臣醜麤服如儀主人如禮

贊曰大禮雖簡鴻儀則容天尊地卑君莊臣恭質文通  
變哀敬交從元序斯立家邦迺隆

後漢書卷十六



後漢書卷十六考證

禮儀志下備三爵如禮注蔡質漢儀曰十二陵今見在河南尹無敬也。○按何焯校本今改令削在字又世至為丘隴何焯校本曰至疑之

後漢書卷十六考證

謹案卷十五第二頁後二行奉牲禱刊本牲訛特  
據監本毛本改

第五頁後三行宋貴人秉淑媛之懿刊本秉訛乘  
又僉曰宜哉刊本僉訛人並據監本改

第十三頁前三行蘇代說孟嘗君代刊本說秦據  
明本及戰國策改

第十四頁後二行戎頭偃脛刊本脛訛肚據監本  
改





總校官庶吉士 臣張能照

校對官檢討 臣蕭九成

謄錄貢生 臣張 宁

欽定四庫全書薈要

史部

後漢書卷十九至

詳校官內閣侍讀孫球



欽定四庫全書蒼要卷三千八百五十二

史部

後漢書卷十七

梁

剡

令劉昭補并注

祭祀志第七

祭祀上

光武即位告天

郊

封禪

祭祀之道自生民以來則有之矣豺獾知祭祀而況人乎故人知之至於念想猶豺獾之自然也顧古質畧而後文飾耳自古以來王公所為羣祀至於王莽漢書郊

祀志既著矣故今但列自中興以來所修用者以為祭

祀志

謝沈書曰蔡邕引中興以來所脩者為祭祀志即邕之意也

建武元年光武即位于鄗為壇營於鄗之陽

春秋保乾圖曰建天

子於鄗之陽名曰行皇

祭告天地采用元始中郊祭故事六宗羣

神皆從未以祖配天地共犢餘牲尚約

黃圖載元始儀最悉曰元始四

年宰衡莽奏曰帝王之義莫大承天承天之序莫重於

郊祀祭天於南就陽位祀地於北主陰義園丘象天方

澤則地圓方因體南北從位燔燎升氣瘞埋就類牲飲

繭栗味尚清玄器成匏勺貴誠因質天地神所統故類

乎上帝禋于六宗望秩山川班于羣神皇天后土隨王

所在而事祐焉甘泉太陰河東少陽咸失廢位不合禮



制聖王之制必上當天心下合地意中考人事故曰愷  
悌君子求福不回而求福厥路不通在易泰卦乾坤  
合體天地交通萬物聚出其律太簇天子親郊天地先  
祖配天先妣配地陰陽之別以日冬至祀天夏至祀后  
土君不省方而使有司六宗日月星山川海星則北辰  
川即河山岱宗三光衆明山阜百川衆流滄汙臯澤以  
類相屬各數秩望相序於是定郊祀祀長安南北郊罷  
其泉河東祀上帝壇圓八觚徑五丈高九尺茅營去  
壇十步竹宮徑三百步土營徑五百步神靈壇各於其  
方面三丈去茅營二十步廣三十五步合祀神靈以璧  
琮用辟神道以通廣各三十步竹宮內道廣三丈有闕  
各九十一步壇方三丈拜位壇亦如之為周道郊營  
之外廣九步營六其泉北辰于南門之外日月海東門  
之外河北門之外岱宗西門之外為周道前望之外  
廣九步列望遂乃近前望道外徑六十二步壇方二丈  
五尺高三尺五寸為周道列望之外徑九步鄉望亞

列望外徑四十步壇廣三丈高二尺為周道卿望之  
外徑九步大夫望亞卿望道外徑二十步壇廣一丈五  
尺高一尺五寸為周道大夫望之外徑九步士望亞  
大夫望道外徑十五步壇廣一丈高一尺為周道士  
望之外徑九步庶望亞士望道外徑九步壇廣五尺高  
五寸為周道庶望之外徑九步凡天宗上帝宮壇營  
徑三里周九里營三重通八方后土壇方五丈六尺  
茅營去壇十步外土營方二百步限之其五零壇土茅  
營如上帝五神去營步數神道四通廣各十步宮內道  
廣各二丈有闕為周道后土宮外徑九步營岱宗西  
門之外河北門之外海東門之外徑各六十步壇方二  
丈高二尺為周道前望之外徑六步列望亞前望道  
外三十六步壇廣一丈五尺高一尺五寸為周道列  
望之外徑六步卿望亞列望道外徑二十五步壇廣一  
丈高一尺為周道卿望之外徑六步大夫望亞卿望  
道之外徑十九步壇廣八尺高八寸為周道大夫望

之外徑六步士望亞大夫望道外徑十二步壇廣六尺  
高六寸 為周道士望之外徑六步凡地宗后土宮壇  
營方二里周八里營再重道四通常以歲之孟春正月  
上辛若丁親郊祭天南郊以地配望秩山川徧于羣神  
天地位皆南鄉同席地差在東共牢而食太祖高皇帝  
高后配于壇上西鄉后在北亦同席共牢而食日冬至  
使有司奉祭天神于南郊高皇帝配而望羣陽夏至使  
有司奉祭地祇于北郊高皇后配而望羣陰天地用牲  
二燔燎瘞埋用牲一先祖先妣用牲一  
天以牲左地以牲右皆用黍稷及樂 其文曰皇天上

帝后土神祇睠顧降命屬秀黎元為民父母秀不敢當  
羣下百僚不謀同辭咸曰王莽篡弒竊位秀發憤興義  
兵破王邑百萬衆於昆陽誅王郎銅馬赤眉青犢賊平

定天下海內蒙恩上當天心下為元元所歸識記曰劉秀發兵捕不道卯金修德為天子秀猶固辭至于再至于三羣下曰皇天大命不可稽留敢不敬承

二年正月初制郊兆於雒陽城南七里依鄩采元始中故事為圓壇八陛中又為重壇天地位其上皆南鄉西上其外壇上為五帝位青帝位在甲寅之地赤帝位在丙巳之地黃帝位在丁未之地白帝位在庚申之地黑帝位在壬亥之地其外為壇重營皆紫以像紫宮有四

通道以為門日月在中營內南道日在東月在西北斗  
在北道之西皆別位不在羣神列中八陸陸五十八醜  
合四百六十四醜五帝陸郭帝七十二醜合三百六十  
醜中營四門門五十四神合二百一十六神外營四門  
門百八神合四百三十二神皆背營內鄉中營四門門  
封神四外營四門門封神四合三十二神凡千五百一  
十四神營即壝也封封土築也背中營神五星也及中  
宮宿五官神及五嶽之屬也背外營神二十八宿外宮

星雷公先農風伯雨師四海四瀆名山大川之屬也至  
七年五月詔三公曰漢當郊堯其與卿大夫博士議時  
侍御史杜林上疏以為漢起不因緣堯與殷周異宜而

舊制以高帝配方軍師在外且可如元年郊祀故事上

從之語在林傳

東觀書載杜林上疏悉於本傳曰臣聞營河維以為民刻肌膚以為刑封疆畫

界以建諸侯井田什一以供國用三代之所同及至漢興因時宜趨世務省煩苛取實事不苟貪高亢之論是以去土中之京師就闕內之遠都除肉刑之重律用髡鉗之輕法郡縣不置世祿之家農人三十而取一政卑易行禮簡易從民無愚智思仰漢德樂承漢祀基業特起不因緣堯堯遠於漢民不曉信言提其耳終不悅諭

后稷近於周民戶知之世據以興基由其祚本與漢異  
郊祀高帝誠從民望得萬國之歡心天下福應莫大於  
此民奉種祀且猶世主不失先俗羣臣僉薦鯨考績不  
成九載乃經宗廟至重衆心難違不可卒改詩云不愆  
不忘率由舊章明當尊用祖宗之故文章也宜如舊制  
以解天下之惑合於易之所謂先天而天弗違後天而  
奉天時義方軍師在外祭隴蜀平後乃增廣郊祀高帝  
可且如元年郊祭故事

配食位在中壇上西面北上

漢舊儀曰祭天祭紫壇幄帷高皇帝祭天居堂下西

向紺帷帳紺席鉤命決曰自外至者無主不止自內出者無匹不行

天地高帝黃帝各用

犢一頭青帝赤帝共用犢一頭白帝黑帝共用犢一頭

凡用犢六頭

漢舊儀曰祭天養牛五歲至三千斤按禮記曰天地之牛角繭栗而此云五歲本志

用犢是也

日月北斗共用牛一頭四營羣神共用牛四頭凡

用牛五頭凡樂奏青陽朱明西皓玄冥及雲翹育命舞

中營四門門用席十八枚外營四門門用席三十六枚

凡用席二百一十六枚皆莞篔簹率一席三神日月北斗

無陸郭醜既送神燬俎實於壇南已地

周禮凡以神位者掌三辰之法

以猶鬼神祇之居辨其名物鄭玄曰猶圖也居謂坐也

天者羣神之精日月星辰其著位也以此圖天神人鬼

地祇之坐者謂布祭衆寡與其居向孝經說郊祀之禮  
曰燔燎掃地祭牲薦栗或象天酒旗坐星厨倉具黍稷  
布席極敬也言郊之布席象五帝坐禮祭宗廟序昭  
穆亦有以虛危則祭天圜立象北極祭地方澤象后妃



及社稷之席  
皆有明法焉

建武三十年二月羣臣上言即位三十年宜封禪泰山  
服虔注漢書曰封者增天之高歸功於天張晏云天高  
不可及於泰山上立封禪而祭之冀近神靈也項威注  
曰封泰山告太平升中和之氣於天祭土為封謂負土  
於泰山為壇而祭也禮記曰因名山升中于天廬植注  
曰封泰山告太平升中和之氣於天也東觀書載太尉  
趙熹上言曰自古帝王每世之隆未嘗不封禪陛下聖  
德洋溢順天行誅撥亂中興作民父母修復宗廟救萬  
姓命黎庶賴福海內清平功成治定羣司禮官咸以為  
宜登封告成為民報德百王所同當仁不讓宜登封  
岱宗正三雍之禮以明靈契望扶羣神以承天心也  
詔  
書曰即位三十年百姓怨氣滿腹吾誰欺欺天乎曾謂

泰山不如林放何事汗七十二代之編錄

莊子曰易姓而王封於秦

山禪於梁父者七十有二代其有形兆垠堦勒石凡千八百餘處許慎說文序曰蒼頡之初作書蓋依類象形

故謂之文其有形聲相溢即謂之字字者言孳乳而滋多也著於竹帛謂之書書者如也以迄五帝三王之世

改易殊體封於泰山者桓公欲封管仲非之若郡縣遠七十有二代靡有同焉

遣吏上壽盛稱虛美必髡兼令屯田從此羣臣不敢復

言三月上幸魯

漢祀令曰天子行有所之出河沈用白馬珪璧各一衣以繒緹五尺祠用脯二

束酒六升鹽一升澆渭灞涇雜佗名水如此者沈珪璧各一律在所給祠具及行沈祠佗川水先驅投石少府給珪璧不滿過泰山告太守以上過故承詔祭山及梁百里者不沈

父時虎賁中郎將梁松等議記曰齊將有事泰山先有

事配林蓋諸侯之禮也河嶽視公侯王者祭焉宜無即

事之漸不祭配林

盧植注曰配林小山林麓配泰山者也謂諸侯不郊天泰山巡省所考五

嶽之宗故有事將祀之先即其漸天子則否矣泰山廟在博縣風俗通曰博縣十月祀岱宗名曰合凍十二月

涸凍正月解凍太守潔齋親自執事作脯廣一尺長五寸既祀訖取泰山君夫人坐前脯三十朐太守拜章縣

次驛馬傳送雒陽

三十二年正月上齋夜讀河圖會昌符曰赤

劉之九會命岱宗不慎克用何益於承誠善用之姦偽不萌感此文乃詔松等復案索河雒讖文言九世封禪

事者松等列奏乃許焉

東觀書曰羣臣奏言登封告成為民報德百王所同陛下輒拒

絕不許臣下不敢頌功述德業河雒識書赤漢九世當  
巡封泰山凡三十六事傳奏左帷陛下遂以仲月令辰  
遵岱嶽之正禮奉圖雒之明文以和靈瑞以為兆民上  
曰至泰山乃復議國家德薄災異仍至圖識蓋如此

初孝武帝欲求神仙以扶方者言黃帝由封禪而後僊

於是欲封禪封禪不常時久莫知元封元年上以方士

言作封禪器以示羣儒多言不合於古於是罷諸儒不

用三月上東上泰山

郭璞注山海經曰泰山從山下至頭四十八里二百步

乃上

石立之泰山顛

風俗通曰石高二丈一尺刻之曰事天以禮立身以義事父以孝成民以仁四

海之內莫不為郡縣四夷八蠻咸來  
貢職與天無極人民蕃息天祿永得  
遂東巡海上求僊

人無所見而還四月封泰山

風俗通曰封廣丈二尺高九尺下有玉牒書也恐

所施用非是乃祕其事語在漢書郊祀志

東觀書曰上至泰山有司

復奏河雒圖記表章赤漢九世无著明者前後凡三十  
六事與博士充等議以為殷統未絕黎庶繼命高宗久  
勞猶為中興武王因父受命之列據三代郊天因孔子  
甚美其功後世謂之聖王漢統中絕王莽盜位一民莫  
非其臣尺土靡不其有宗廟不祀于有八年陛下無十  
室之資奮振於匹夫除殘去賊興復祖宗集就天下海  
內治平夷狄慕義功德盛於高宗武王宜封禪為百姓  
祈福請親定刻石紀號文太常奏儀制詔曰許昔小白  
欲封夷吾難之季氏欲旅仲尼非焉蓋齊諸侯季氏大  
夫皆無事於泰山今予末小子巡祭封禪德薄而任重

一則以喜一則以懼喜於得承鴻業帝堯善及子孫之餘賞蓋應圖錄當得是當懼於過差執德不弘信道不篤為議者所誘進後世知吾罪深矣上許梁松等奏乃求元封時封禪故事議封禪所施用有司奏當用方石再累置壇中皆方

五尺厚一尺用玉牒書藏方石牒厚五寸長尺三寸廣五寸有玉檢又用石檢十枚列於石傍東西各三南北各二皆長三尺廣一尺厚七寸檢中刻三處深四寸方五寸有蓋檢用金縷五周以水銀和金以為泥玉璽一方寸二分一枚方五寸方石四角又有距石皆再累枚

長一丈厚一尺廣二尺皆在圓壇上其下用距石十八枚皆高三尺厚一尺廣二尺如小碑環壇立之去壇三步距石下皆有石跗入地四尺又用石碑高九尺廣三尺五寸厚尺二寸立壇丙地去壇三丈以上以刻書上以用石功難又欲及二月封故詔松欲因故封石空檢更加封而已

欲及二月者虞書歲二月東巡狩至于岱宗柴范甯曰巡狩者巡行諸侯所守二月

直卯故以東巡狩也祭山曰燔柴積柴加牲於其上而燔之也

松上疏爭之以為登封

之禮告功皇天垂後無窮以為萬民也承天之敬尤宜

章明奉圖書之瑞尤宜顯著今因舊封竄寄玉牒故石  
下恐非重命之義受命中興宜當特異以明天意遂使  
泰山郡及魯趣石工宜取完青石無必五色時以印工  
不能刻玉牒欲用丹漆書之會求得能刻玉者遂書書

祕刻方石中命容玉牒二月上至奉高

應劭漢官馬第伯封禪儀記曰

車駕正月二十八日發雒陽宮二月九日到魯遣守謁  
者郭聖伯將徒五百人治泰山道十日魯遣宗室諸劉  
及孔氏瑕丘丁氏上壽受賜皆詣孔氏宅賜酒肉十一  
日發十二日宿奉高是日遣虎賁郎將先上山三案行  
還益治道徒千人十五日始齋國家居太守府舍諸王  
居府中諸侯在縣庭中齋諸卿校尉將軍大夫黃門郎



百官及宋公衛公褒成侯東方諸侯維中小侯齋城外  
汶水上太尉太常齋山虞馬第伯自云某等七十人先  
之山虞觀祭山壇及故明堂宮郎官等郊肆處入其幕  
府觀治石石二枚狀博平圓九尺此壇上石也其一石  
武帝時石也時用五車不能上也因置山下為屋號五  
車石四維距石長丈二廣二尺厚尺半所四枚檢石長  
五尺廣六寸狀如封篋長檢十枚一紀號石高丈二尺  
廣三尺厚尺二寸名曰立石一枚刻文字紀功德是朝  
上山騎行往往道峻峭不騎步牽馬乍步乍騎且相半  
至中觀留馬去平地二十里南向極望無不覩仰望天  
關如從谷底仰觀抗峰其為高也如視浮雲其峻也石  
壁窅窅如無道徑遙望其人端如行朽兀或為白石或  
雪久之白者移過樹乃知是人也殊不可上四布僵卧  
石上有頃復蘇亦賴齋酒脯處處有泉水目輒為之明  
復勉強相將行到天闕自以已至也問道中人言尚十  
餘里其道旁山脅大者廣八九尺狹者五六尺仰視巖

石松樹鬱鬱蒼蒼若在雲中俛視豁谷碌碌不可見丈尺遂至天門之下仰視天門窅窅如從穴中視天直上七里賴具羊腸逶迤名曰環道往往有絙索可得而登也兩從者扶掖前人相牽後人見前人履底前人見後人頂如畫重累人矣所謂磨胸擗石捫天之難也初上此道行十餘步一休稍疲咽唇焦五六步一休牒牒據頓地不避濕暗前有燥地目視而兩脚不隨早食上曠後到天門郭使者得銅物銅物形狀如鍾又方柄有孔莫能識也疑封禪具也得之者汝南召陵人姓楊名通東上一里餘得木甲木甲者武帝時神也東北百餘步得封所始皇立石及闕在南方漢武在其北二十餘步得北垂圓臺高九尺方圓三丈所有兩陛人不得從上從東陞上臺上有壇方一大二尺所有方石四維有距石四面有闕鄉壇再拜謁人多置錢物壇上亦不掃除國家上見之則詔書所謂酢梨酸棗狼藉散錢處數百幣帛具道是武帝封禪至泰山下未及上百官為先

上跪拜置梨棗錢于道以求福即此也東山名曰日觀  
日觀者鷄一鳴時見日始欲出長三丈所秦觀者望見  
長安吳觀者望見會稽周觀者望見齊西北有石室壇  
以南有玉盤中有玉龜山南脅神泉飲之極清美利人  
日入下去行數環日暮時頗雨不見其道一人居其遺  
前先知蹈有人乃舉足隨之比至天門下夜人定矣遣  
侍御史與蘭臺令史將工先上山刻石文曰維建武三

十有二年二月皇帝東巡狩至于岱宗柴

風俗通曰岱者胎也宗者

長也萬物之始陰陽之交觸皮膚寸而合不崇朝而徧雨天下惟泰山乎故為五岳之長耳

望秩於

山川

孔安國書注曰九州名山大川五岳四瀆之屬皆一時望祭之安國又曰喻以尊卑祭之也五嶽視

三公四瀆視諸侯其餘小者或卿大夫伯子男

班于羣神

孔安國曰羣神謂立陵墳衍古之聖賢皆

祭之矣遂覲東后從臣太尉熹行司徒事特進高密侯禹

等漢寶二王之後在位孔子之後褒成侯序在東后蕃  
王十二咸來助祭河圖赤伏符曰劉秀發兵捕不道四  
夷雲集龍鬪野四七之際火為主河圖會昌符曰赤帝  
九世巡省得中治平則封誠合帝道孔矩則天文靈出  
地祇瑞興帝劉之九會命岱宗誠善用之姦偽不萌赤  
漢德興九世會昌巡岱皆當天地扶九宗經之常漢大  
興之道在九世之王封于泰山刻石著紀禪于梁父退

省考五河圖合古篇曰帝劉之秀九名之世帝行德封  
刻政河圖提劉子曰九世之帝方明聖持衡拒九州平  
天下予雒書甄曜度曰赤三德昌九世會修符合帝際  
勉刻封孝經鉤命決曰予誰行赤劉用帝三建孝九會  
修專茲竭行封岱清河雒命后經讖所傳昔在帝堯聰  
明密微讓與舜庶後裔握機王莽以舅后之家三司鼎  
足冢宰之權勢依託周公霍光輔幼歸政之義遂以篡  
叛僭號自立宗廟隳壞社稷喪亡不得血食十有八年

揚徐青三州首亂兵革橫行延及荊州豪傑并兼百里  
屯聚往往僭號北夷作寇千里無煙無鷄鳴犬吠之聲  
皇天睠顧皇帝以匹庶受命中興年二十八載興兵起

是以中次誅討十有餘年罪人則斯得黎庶得居爾田  
安爾宅書同文車同軌人同倫舟輿所通人迹所至靡  
不貢職建明堂立辟雍起靈臺設庠序同律度量衡

孔安

國書注曰同音律也度

丈尺量斗斛衡斤兩也

修五禮孔安國曰公侯伯子男朝聘之禮范甯曰吉凶

賓軍五玉范甯曰五等諸侯之瑞珪璧也

三帛

孔安國曰諸侯世子執纁公之孤執玄附庸之

君執黃范甯曰玄二牲范甯曰羔鴈也卿一死雉也士

執黃三孤所執贊范甯曰總謂上所更各修職復于舊典在位三十有

二年年六十二乾乾日昃不敢荒寧涉危履險親巡黎

元恭肅神祇惠恤耆老理庶遵古聰允明恕皇帝唯慎

河圖雒書正文是月辛卯柴登封泰山甲午禪于梁陰

以承靈瑞以為兆民永茲一字垂于後昆百僚從臣郡

守師尹咸蒙祉福永永無極秦相李斯燔詩書樂崩禮

壞建武元年已前文書散亡舊典不具不能明經文以

章句細微相況八十一卷明者為驗又其十卷皆不昭

哲子貢欲去告朔之餼羊子曰賜也爾愛其羊我愛其

禮後有聖人正失誤刻石記

封禪儀曰車駕十九日之山虞國家居亭百官布野

比日山上雲氣成宮闕百官並見之二十一日夕牲時

白氣廣一丈東南極望致濃厚時天清和無雲瑞命篇岱嶽之瑞以

日為應也 二十二日辛卯晨燎祭天於泰山下南方

羣神皆從用樂如南郊

封禪儀曰晨祭也日高三丈所燔燎燔燔煙正上也

諸王

王者後二公孔子後褒成君皆助祭位事也

封禪儀曰百官各以

次上郡儲輦三百為貴臣詣公王侯卿大夫百官皆步上少用輦輦者千寶周禮注曰對輦曰輦

事畢



將升封或曰泰山雖已從食於柴祭今親升告功宜有

禮祭於是使謁者以一特牲於常祠泰山處告祠泰山

如親耕軀劉先祠先農先虞故事至食時御輦升山

儀曰國家御首輦人輓升山至中觀休須臾復上日中後到山上更衣

封禪儀曰須臾羣臣畢就位早晡時即位于壇北面羣臣以次陳後西上畢

位升壇封禪儀曰國家臺上北面虎賁陛戟臺下尚書令奉玉牒檢皇帝以

寸二分璽親封之訖太常命人發壇上石

封禪儀曰駒騎三千餘人發壇上方石尚書令藏玉牒已復石覆訖尚書令以五寸印

封石檢

封禪儀曰以金為繩以石三檢東方西方各三檢檢中石泥及壇土色赤白黑各依如其方色

事畢皇帝再拜羣臣稱萬歲

封禪儀曰稱萬歲音動山谷有氣屬天遙望不見山

巔山巔人在

命人立所刻石碑乃復道下

封禪儀曰封

氣中不知也

官以次下國家隨後數百人維持行相逢推百官連延二十餘里道多迫小深谿高岸數百丈步從匍匐邪上起近炬火止亦駱驛步從觸擊大石石聲正謹但謹石無相應和者賜不能已口不能默夜半後到百官明旦乃訖其中老者氣劣不能行臥巖石下明日早太醫令復遵問起居國家云昨上下山欲行迫前欲休則後人所蹈道峻危險恐不能度國家不勞百官以下露卧水飲無一人蹉跌無一人疾病豈非天邪泰山率多暴雨如今上直下柴祭封登清晏溫和明日上壽賜百官省事畢發暮宿奉高三十里明日發至梁甫九十里夕

牲

二十五日甲午禪祭地于梁陰以高后配山川羣神

從如元始中北郊故事

服虔曰禪廣土地項威曰除地為壇後改壇曰禪神之矣封禪

儀曰功效如彼天應如此羣臣上壽國家不聽

四月己卯大赦天下以建武三

十二年為建武中元元年復博奉高嬴勿出元年祖芻

橐以吉日刻玉牒書函藏金匱璽印封之乙酉使太尉

行事以特告至高廟

虞典曰歸格于藝祖用特

太尉奉匱以告高廟

藏于廟室西壁石室高主室之下

袁宏曰夫天地者萬物之官府山川者雲

雨之丘墟萬物生遂則官府之功大雲雨施潤則丘墟之德厚故化洽天下則功配於天地澤流一國則德合

於山川是以王者經略必以天地為本諸侯述職必以山川為主體而象之取其陶育禮而告之歸其宗本書曰東巡狩至于岱宗柴傳曰郊祀后稷以祈農事夫巡狩觀化之常事祈農撫民之定業猶潔誠殷薦以告昊天況創制改物人神易聽者乎夫揖讓受終必有至德於天下征伐革命則有大功於萬物是故王者初基則有封禪之事蓋以其成功告於神明者也夫東方者萬物之所始山嶽者靈氣之所宅故求之物本必於其始取其所通必於所宅崇其壇場則謂之封明其代興則謂之禪然則封禪者王者開務之大禮也德不周洽不得輒議斯事功不弘濟不得髣髴斯禮曠代一有其道至高故自黃帝堯舜至三代各一得封禪未有中修其禮者也雖繼職之君時有功德此蓋率復舊業增修其前政不得仰齊造國同符改物者也夫神道貞一其用不煩天地易簡其禮尚質故藉用白茅貴其誠素器用陶匏取其易從然封禪之禮簡易可也若夫金函玉牒

非天地  
之性也

後漢書卷十七

後漢書卷十七考證

祭祀志上九州平天下予○予本或作子

後漢書卷十七考證